



The Holy See

IOANNES PAULUS EPISCOPUS

SERVUS SERVORUM DEI

AD PERPETUAM REI MEMORIAM CONSTITUTIO APOSTOLICA **COMPLUTENSIS** IN HISPANIA NOVA
CONDITUR DIOECESIS COMPLUTENSIS NOMINE In hac beati Petri Cathedra constituti urgemur cotidie
spirituali omnium Christifidelium bono atque regimini magna sollicitudine, Deo iuvante, consulere. Qua re, cum
Venerabilis Frater Noster Angelus S. R. E. Cardinalis Suquía Goicoechea, Archiepiscopus Matritensis, Conferentia
Episcoporum Hispaniae audita, ab hac Apostolica Sede petivisset ut a perampla circumscriptione ecclesiastica sua
quibusdam distractis locis nova constitueretur dioecesis, Nos, favente quoque eidem rei Venerabili Fratrem Mario
Tagliaferri, Archiepiscopo titulo Formiano, in eadem Natione Apostolico Nuntio, de consilio Congregationis pro Episcopis
admotae postulationi libentes concedendum esse putavimus. Apostolica igitur Nostra usi potestate quae sequuntur
decernimus atque iubemus. Ab archidioecesi Matritensi integrum territorium separamus quod complectitur civilia
municipia patri sermone nuncupata : Ajalvir, Alcalá de Henares, Algete, Ambite, Anchuelo, Arganda del Rey, Brea de
Tajo, Camarma de Esterezuelas, Carabana, Cobena, Campo Real, Corpa, Coslada, Daganzo de Arriba, Estremera,
Fresno de Torote, Fuente el Saz de Jarama, Fuentidueña de Tajo, Loeches, Mejorada del Campo, Meco, Morata de
Tajuña, Nuevo Baztán, Olmeda de las Fuentes, Orusco, Perales de Tajuña, Pezuela de Torres, Pozuelo del Rey,
Ribatejada, Rivas-Vaciamadrid, Santorcaz, San Fernando de Henares, Los Santos de la Hunosa, Talamanca de Jarama,
Tielmes, Torrejón de Ardoz, Torrelaguna, Torremocha de Jarama, Torres de la Alameda, Valdaracete, Valdeavero,
Valdeolmos, Valdepiélagos, Valdetorres de Jarama, Valdilecha, Valverde de Alcalá, Velilla de San Antonio, Villabilla,
Villamanrique de Tajo, Villar del Olmo, Villarejo de Salvanés, Paracuellos Jarama, Patones, atque ex ita distractis locis
novam condimus dioecesim *Complutensem* appellandam, quae iisdem limitabitur finibus, quibus municipia, quae
memoravimus, ut civili lege exstant, praesens terminantur, mandantes ut Complutensis titulus, archidioecesi Matritensi
adnexus, nunc et in posterum ab eadem auferatur. Sic conditae Ecclesiae sedem in urbe cui nomen « Alcalá de Henares
» ponimus, episcopalis magisterii cathedram in templo ibi exstante, Deo in honorem Sanctorum Iusti et Pastoris dicato,
quod ad cathedralis Ecclesiae gradum evehimus cuique insignia, privilegia honoresque tribuimus, quae ceterarum
cathedralium Ecclesiarum sunt. Praeterea Complutensem dioecesim suffraganeam facimus metropolitanae Sedi
Matritensi eiusque pro tempore Episcopum metropolitico iuri Archiepiscopi Matritensis subicimus, iisdem iuribus,
privilegiis honoribusque insignitum atque oneribus officiisque adstrictum, quae Episcoporum residentium propria sunt.
Praecipimus insuper ut quam primum ibidem Collegium Consultorum constituatur, qui Episcopo, consilio et opera, valido
sint auxilio. Congruae vero sustentationi Praesulis novae dioecesis provideatur Curiae emolumentis, fidelium oblationibus
et portione bonorum, quae ad normam [can. 122](#) C. I. C. a mensa archiepiscopali Matritensi ei debent obvenire. In iis
quidem quae respiciunt ad seminarii dioecesani aedificationem atque ad sacrorum alumnorum institutionem servantur
praescripta iuris communis, habita sane ratione normarum regularumque a Congregatione de Institutione Catholica

editarum. Provideatur quoque ut selecti seminarii alumni, philosophicis ac theologicis imbuendi disciplinis, necnon sacerdotes quibus studia complenda fuerint, Romam ad Pontificium Collegium Hispanicum mittantur. Quod autem attinet ad novae dioecesis regimen, administrationem bonorum, dioecesani administratoris, vacante sede, electionem, fidelium iura oneraque aliaque id genus, ad amussim observentur quae sacri canones praescribunt. Atque simili ac dioecesis erectio ad effectum deducta fuerit, eo ipso sacerdotes adscripti censeantur Ecclesiae in cuius territorio ecclesiasticum detinent officium ; ceteri vero clerici seminarii que tirones incardinati maneant vel incardinentur Ecclesiae in cuius territorio legitimum habent domicilium ; quibus cunctis facultatem facimus petendi intra quinquennium, iusta de causa deque consensu Ordinariorum quorum interest, ut ad aliam dioecesim Provinciae Ecclesiasticae Matritensis transeant. Acta et documenta quae respiciunt ad novam dioecesim eiusque clericos, fideles bonaque temporalia, a Matritensi Curia ad Curiam Complutensem transmittantur de more. Haec, quae praescripsimus, ad effectum adducat Venerabilis Frater Marius Tagliaferri, quem diximus, cui necessarias et oportunas tribuimus facultates etiam subdelegandi ad omnia exsequenda de quibus agitur quemlibet virum in ecclesiastica dignitate constitutum, onere imposito ad Congregationem pro Episcopis remittendi sincerum actus perfectae executionis exemplar. Has denique Litteras sive nunc sive in posterum ratas esse volumus, contrariis quibuslibet rebus non obstantibus. Datum Romae, apud S. Petrum, die vicesimo tertio mensis Iulii, anno Domini millesimo nongentesimo nonagesimo primo, Pontificatus Nostri tertio decimo.

ANGELUS SODANO, archiep. <i>Secretarius Status</i>	BERNARDINUS card. GANTIN <i>Congr. pro Episcopis Praef.</i>
---	--

Marcellus Rossetti, *Protonot. Apost.*

Franciscus Chiaurri, *Protonot.*

Apost.

*A.A.S., vol. LXXXIII (1991), n. 12, pp. 1012-1014 © Copyright 1990 - Libreria Editrice Vaticana